



OLERKI - SARIKETA

Langilleak merezi dau saria; geiago euskal kulturari saiatzen danak. Eta Elbire andereñoa egiz saiatu jakun orretan. Nik bein eta barrero aurkitu neban bere etxean, Donostiko alderdi zarrean, euskeraz ikasten ebiltzan aur-mordoaz lurrean kukurumixo, orduak eta orduak. Etzitun olantxe urte gitxi bota. Emakume langillea, beraz, eta gogoratzea merezi dauana.

Euskaltzale danok ezagutzen genduan, gipuzkor, bizkaitar, lapurditar. Bizkaia ezagutzen etorritako ibillaldiren baten Bermeo ta Larrauri artean, Sollube ertzean daukazun Maiñu erritxora jo euskun, eta ango apaiz euskaltzaleagaz, Gotzon Garitaonaindia'gaz adiskide-adiskide egin zan; onek Donostira joaten zanean andereñoa eta umeak ikastera eroan oi nindun, eta euskal irakasleak, il zanean, antxe, Mañu'ko eleiz-ondotxoan nai izan eban bere gorpuari lur emotea.

Euskerazaintzak, Donostiko Aurrezki-Kutxa Munizipalak lagunduta, sari-keta bi beintzat antziñatxu eratu zituan, Elbire Zipitria andereñoaren ize-nekoak. Aurten ospatu ditu Ipuin-Sariketa eta Olerki-sariketa VII'garren urtez.

Olerki-sariketarako emeretzki lan eldu jakuzan. Oneik: "Zazpi izarrak", "Bizitzaren ispillu", "Nire amari", "Irakasleari", "Damuak", "Udabarria amesten", "Bion aterpean", "EAbereen doñuak", "Zugarramurdiko sorgiñak", "Solasean", "Goizetik gaualdera", "Katagorri gorria", "Illunabar bateko oroitzapenak", "Euskera seaskatik", "Sorgiñak", "Euri", "Amaren billa", "Nola hala gabiltza", "Euskal sena".

Epai-maiko egin ebenak: Arrinda'tar Anes, Zubikarai'tar Augustin, Olazar'tar Martin, Onaindia'tar Jagoba eta Gaztañaga'tar Jesus. Lau sari emon ziran; lenengoa 40.000 pezeta (Ugarte'tar Martin), "Zazpi izarrak" jaso eben; bigarrena, 30.000 pezeta (Beloki'tar Augustin), "Bion aterpean" irabazle; irugarrena 25.000 pezeta (Urzelai'tar Gaizka), irabazle; eta laugarrena, 20.000 pezeta (Esnaola'tar Anastasio), "Nire amari" irabazle.

Lau olerkiok banan-banan, sari-keta saillean agertzen dira.

Zelakoak ete ditugu aitaturiko emeretzki olerkiok? Ba-dira onak, umeentzako lau-lau egiñak; ba-dira baita exkas samarrak be, bape zentzun barik moldatuak. Ondo egiñak, txalotzen ditut; besteak ez ditut ezesten, iforen alegiñak ez bait doguz arbuia bear. Alan be, olerkia olerki da; bere teknika berezia dau. Beraz, olerkitzari ekin nai dautsonak, teknika orrek eskatzen ditun legeak ikasi ta eder-lan ortan jardutean lege orrean

esi barruan jokatu bear dau. Dagianari poesi izena emon nai ba'dautso.

Nik sarri esan oi dausat santutasuna ta olerkia bide bardiñez dabiltzala, eta arek ez dau olakorik entzun nai. Idazle eta santu askok alkartu izan dabez pentsamentu biok. Or Santa Teresa ta Juan Gurutzekoa, gure barriztatzaille gotorrak. Biblia osoa eder-senez gaiñezka daukazu. Olerkia, dudarik bage, Jainkoak gizonai damotsen aparteko doaia dozu.

Elbire'k ez eban olerkirik idatzi, baiña bizitzan, umeai erakustean, Mañu'ko eleiz-ondoan bere gorpuari lur emon gura izatean, olerkari genduan.

Aita Onaindia

“ELBIRE ANDERENOA”

IDAZ SARIKETAK

IPUIÑAK

EUSKERAZAINTZAK Donostia'ko Getaria kaleko 21'garrenean daukan idazgelan, Agirre'tar M. Dolores, Zubikarai'tar Augustin, Yurramendi'tar Felipe, Gaztañaga'tar Jesus, Zubiri'tar Iñaki eta Kortajarena'tar Andoni jaun-andreak, ELBIRE ANDERENOA VII Ipuin-sariketara aurkeztutako lanak aztertzeko epai-maia osaturik, azterketa sakon bat egin ondoren, sariak era ontan banatzea erabaki dute:

A MAILLA

1'go saria: "Benetako abentura", Ernani'ko Etxeberria'tar Dabid'ek idatzia	15.000 pezta
2'gn saria: "Peruren bidaria", Ernani'ko Galarraga'tar Arkaitz'ek idatzia	10.000 pezta

B MAILLA

1'go saria: "Basamortu ondartsua", Zurriola ikastolako, Arze'tar Amaia'k idatzia	10.000 pezta
2'gn saria: "Basamortu liburua", Urumea ikastolako, Soriazu'tar Alejandro'k idatzia	8.000 pezta
3'gn saria: "Patxiko Basajauna" Ondarroa'ko Txomin Agirre ikastolako, Badiola'tar Nerea'k idatzia	6.000 pezta
4'gn saria (a): "Euskal-Erriko basamortua", Zurriola ikastolako, Gonzalez Arizeta'tar Jon Xabier'ek idatzia	4.000 pezta
4'gn saria (b): "Istoria arraroa", Urumea ikastolako, Iturralde'tar Begoña'k idatzia	4.000 pezta